

Bosna i Hercegovina
Federacija Bosne i Hercegovine
Kanton Sarajevo
JU Treća gimnazija
Vijeće roditelja školske 2024/25. godine

Sarajevo, 21. 11. 2024. godine

ZAPISNIK

Druge redovne sjednice Vijeća roditelja

Druga redovna sjednica Vijeća roditelja održana je 21.11.2024. godine u amfiteatru Treće gimnazije sa početkom u 17.30 sati.

Sjednici je prisustvovalo 19 članova Vijeća roditelja od minimalno potrebnih 13 članova, što je kvorum za održavanje sjednice Vijeća roditelja prema članu 16. Poslovnika o radu Vijeća roditelja. Odsutno je bilo 5 članova Vijeća roditelja od kojih su 4 najavila svoj izostanak (g. Tihomir Veselinović (II3), gđa. Edina Sujoldžić (II6), g. Remzija Šetić (III6) i g. Alija Vegara (IV4)), a gđa. Admira Salić-Čano (IV6) se naknadno izvinula zbog svog izostanka radi neplanirane obaveze na poslu.

Gospođu Irmu Sokolović (III2) na sjednici Vijeća roditelja je mijenjala gđa. Dunja Pašalić, g. Osmana Terzića (III5) je mijenjao g. Ahmed Hadžić, a gđu. Ajlu Dautbašić (IV3) je mijenjala gđa. Snježana Brkić.

Sjednici Vijeća roditelja prisustvovali su i predstavnici škole JU Treća gimnazija i to direktorica škole gđa. Amra Čolić, zamjenica direktorice gđa. Meliha Salihović i pedagog škole gđa. Hasija Dedović.

Sjednici su također prisustvovali predstavnici Policijske uprave Novo Sarajevo gđa. Jasmina Krilo i g. Mahir Glamoč u okviru planirane 11. tačke dnevnog reda (Edukacija roditelja).

Predloženi dnevni red sjednice bio je:

1. Usvajanje Zapisnika sa Prve redovne sjednice Vijeća roditelja JU Treća gimnazija
2. Usvajanje novog Poslovnika o radu Vijeća roditelja
3. Usvajanje novog Protokola komunikacije i saradnje roditelja sa školom
4. Razmatranje i usvajanje Plana i programa rada Vijeća roditelja za šk. 2024/25. god.
5. Analiza uspjeha u učenju i vladanju sredinom I polugodišta
6. Izbor predstavnika Vijeća roditelja u ocjenjivački žiri za Decembarske dane kulture
7. Izbor predstavnika roditelja u Komisiju za izbor putničke agencije - najboljeg ponuđača za realizaciju ekskurzije učenika u školskoj 2024/25. god.
8. Informacija o projektu „Digitalno građanstvo“ - gđa. Darija Ramljak
9. Usvajanje dvije inicijative Vijeća roditelja (pravdanje izostanaka i ishrana u školi)
10. Produžetak sporazuma o saradnji sa Udruženjem „Alumni Treće gimnazije Sarajevo“
11. Edukacija roditelja - Policijska uprava Novo Sarajevo, inspektorica Jasmina Krilo
12. Tekuća pitanja
 - Inicijativa - nastavak „Škole roditeljstva“ u Trećoj gimnaziji

Dnevni red je usvojen većinom glasova članova Vijeća roditelja, uz dva suzdržana glasa, g. Mirza Hulusić (II5) i g. Ahmed Hadžić (III5), sa izmjenom u redosljedu tačaka. Iz praktičnih razloga, 11. tačka dnevnog reda pomjerena je na početak sjednice kao prva radi toga da predstavnici PU Novo Sarajevo ne bi nepotrebno čekali na svoje sudjelovanje na sjednici.

Ad/1

(Edukacija roditelja - Policijska uprava Novo Sarajevo, inspektorica Jasmina Krilo)

Inspektorica PU Novo Sarajevo gđa. Jasmina Krilo edukativno se obratila Vijeću roditelja vezano za anonimne dojave o postavljenim eksplozivnim sredstvima (bombama) u školama Kantona Sarajevo.

Edukacija roditelja, konstatovala je gđa. Krilo u uvodu, preventivnog je karaktera i ima za cilj podizanje svijesti roditelja i djece o krivičnoj odgovornosti djece i roditelja koji sudjeluju, direktno ili indirektno, u aktivnostima anonimnih dojava o postavljanju bombi u školama. Krivična odgovornost, naglasila je, obuhvata i one osobe koje podstiču ili pomažu ovakve aktivnosti maloljetnika kao i roditelje koji u datom kontekstu ne vrše adekvatan nadzor svoje djece, navodeći pri tome zakone koji krivično tretiraju ovakva postupanja.

Iznijela je podatak da je u periodu od 14.10.2024. do 27.10.2024. godine bilo 160 lažnih dojava o postavljanju eksplozivnih sredstava u školama KS te da se u preko 90% slučajeva radi o maloljetnim licima.

Inspektorica Krilo je na kraju svog izlaganja napomenula da počinioci ovakvih krivičnih djela bivaju evidentirani u registru počinitelja krivičnih djela što može uticati na njihovo buduće zaposlenje jer bivaju markirani kao krivično osuđene osobe.

Pitanja članova Vijeća roditelja inspektorici Krilo odnosila su se uglavnom za preciziranje određenih podataka i saznanja vezanih za policijsku istragu navedenih anonimnih dojava. Gđa. Krilo je pojasnila da je istraga u toku, te da se konkretniji podaci u ovom trenutku, osim navedenih, okvirnih, ne smiju iznositi.

Edukativna prezentacija inspektorice Krilo Vijeću roditelja data je u prilogu dokumenata ovog zapisnika a Vijeće roditelja preporučuje svojim članovima njeno prosljeđivanje roditeljima odjeljenja sa ciljem informisanja i izvjesne edukacije roditelja u ovom smislu.

Ad/2

(Usvajanje Zapisnika sa Prve redovne sjednice Vijeća roditelja JU Treća gimnazija)

Prijedlog Zapisnika sa Prve redovne sjednice Vijeća roditelja, prethodno dostavljenog članovima Vijeća roditelja uz dnevni red sjednice, usvojen je većinom glasova članova Vijeća uz jedan suzdržan glas (g. Ahmed Hadžić (III5)).

Ad/3

(Usvajanje novog Poslovnika o radu Vijeća roditelja)

Predsjednica Vijeća roditelja gđa. Aida Aganović (III1), gđa. Amra Pešto (III3) i g. Izet Turković (I5) iznijeli su neke okvirne informacije vezano za usklađivanje Poslovnika o radu Vijeća roditelja sa Zakonom o odgoju i obrazovanju u osnovnoj i srednjoj školi u Kantonu Sarajevo, na čemu su, kao članovi komisije, radili sa pedagogom škole gđom. Hasijom Dedović.

Prijedlog Poslovnika o radu Vijeća roditelja, koji je Vijeću roditelja dostavila navedena komisija, usvojen je većinom glasova članova Vijeća uz jedan suzdržan glas (g. Ahmed Hadžić (III5)).

Ad/4

(Usvajanje novog Protokola komunikacije i saradnje roditelja sa školom)

Predsjednica Vijeća roditelja gđa. Aida Aganović (III1), gđa. Amra Pešto (III3) i g. Izet Turković (I5) iznijeli su osnovne informacije usklađivanja Protokola komunikacije i saradnje roditelja sa školom sa Zakonom o odgoju i obrazovanju u osnovnoj i srednjoj školi u Kantonu Sarajevo. Ova tri člana Vijeća su, kao članovi komisije zajedno sa pedagogom škole gđom. Hasijom Dedović, radili na usklađivanju pomenutog Protokola sa navedenim zakonom.

Prijedlog Protokola komunikacije i saradnje roditelja sa školom koji je Vijeću roditelja dostavila navedena komisija usvojen je većinom glasova članova Vijeća uz jedan suzdržan glas (g. Ahmed Hadžić (III5)).

Ad/5

(Razmatranje i usvajanje Plana i programa rada Vijeća roditelja za šk. 2024/25. god.)

Plan i program rada Vijeća roditelja za školsku 2024/25. godinu rukovodstvo Vijeća roditelja dostavilo je članovima Vijeća kao pripremni dokument za sjednicu. Na ovaj dokument nije bilo primjedbi članova Vijeća roditelja.

Plan i program rada Vijeća roditelja za školsku 2024/25. godinu usvojen je većinom glasova članova Vijeća uz jedan suzdržan glas (g. Ahmed Hadžić (III5)).

Ad/6

(Analiza uspjeha u učenju i vladanju sredinom I polugodišta)

Zamjenica direktorice škole gđa. Meliha Salihović je prezentirala Vijeću roditelja podatke vezane za analizu uspjeha u učenju i vladanju učenika sredinom prvog polugodišta.

Prezentirani podaci gđe. Salihović biće dostavljeni članovima Vijeća roditelja u formi posebnog dokumenta.

Ad/7

(Izbor predstavnika Vijeća roditelja u ocjenjivački žiri za Decembarske dane kulture)

Direktorica škole gđa. Amra Čolić dala je Vijeću roditelja neke osnovne informacije vezano za kulturnu manifestaciju Treće gimnazije „Decembarski dani kulture“.

Manifestacija će najvjerovatnije biti održana 30. decembra 2024. godine, a u ocjenjivački žiri manifestacije ispred Vijeća roditelja odabrani su gđa. Indira Čečo-Hidić (II1) za prve i treće razrede i g. Izet Turković (I5) za druge i četvrte razrede škole.

Ad/8

(Izbor predstavnika roditelja u Komisiju za izbor putničke agencije - najboljeg ponuđača za realizaciju ekskurzije učenika u školskoj 2024/25. god.)

Direktorica škole gđa. Amra Čolić obavjestila je Vijeće roditelja o izmjenama propisa vezanih za organizaciju ekskurzija učenika koje su dostavljene školama od strane nadležnog Ministarstva za odgoj i obrazovanje Kantona Sarajevo.

Ove izmjene, pojasnila je direktorica Čolić, između ostalog, propisuju zabranu noćne vožnje učenika na ekskurzijskim putovanjima. To će, pretpostavlja, dovesti do određenih ograničenja kada su u pitanju neke ekskurzijske destinacije, a također će uticati i na povećanje cijene ekskurzije.

Za predstavnike Vijeća roditelja u Komisiji za izbor putničke agencije - najboljeg ponuđača za realizaciju ekskurzije učenika u školskoj 2024/25. godini izabrani su roditelji učenika trećih razreda i to gđa. Irma Sokolović (III2) i gđa. Amra Pešto (III3).

Ad/9

(Informacija o projektu „Digitalno građanstvo“ - gđa. Darija Ramljak)

Gospođa Darija Ramljak (I6) prenijela je Vijeću roditelja informacije o projektu „Digitalno građanstvo“ koju provodi udruženje „Ciritas“ a kojim je obuhvaćeno 26 osnovnih i srednjih škola Kantona Sarajevo.

Više o ovom projektu može se pročitati u dokumentima koji će biti dostavljeni članovima Vijeća roditelja.

Ad/10

(Usvajanje dvije inicijative Vijeća roditelja (pravdanje izostanaka i ishrana u školi)

Vijeću roditelja dostavljena je, uz pripremna dokumenta sjednice, Inicijativa za revidiranje Pravilnika o izricanju odgojno-disciplinskih mjera u osnovnim i srednjim školama Kantona Sarajevo u vezi sa brojem dana koje roditelj može pravdati za svoje dijete u školi. Pravilnik predviđa 2 dana pravedanja od strane roditelja djeteta u jednom polugodištu, a ova inicijativa traži 5 dana pravedanja.

Gospodin Izet Turković (I5) je izrazio svoje protivljenje ovoj inicijativi. Rekao je da misli da su škole već godinama opterećene velikim brojem izostanaka djece iz škole što je problem koji je, anonimnim dojavama o postavljanju ekspozivnih sredstava u školama, dodatno eskalirao. Misli da bi usvajanje ove inicijative samo pogoršalo već lošu situaciju i problem sa izostancima djece u školama.

Pedagog škole gđa. Hasija Dedović također se kritički osvrnula na pomenutu inicijativu. Između ostalog, pojasnila je da djeca i roditelji često pogrešno shvataju smisao pravedanja izostanaka djece u školi (za slučaj, prije svega, bolesti djeteta) razumjevajući da pravedanje izostanaka treba iskoristiti kao mogućnost slobodnih dana za dijete.

Vijeće roditelja, većinom glasova članova Vijeća, uz jedan glas protiv, g. Izet Turković (I5) i jedan suzdržan glas g. Ahmed Hadžić (III5), podržalo je ovu inicijativu i prosljediće je VROŠKS putem svog predstavnika gđe. Aide Aganović.

Vijeću roditelja također je dostavljena, uz priprema dokumenta sjednice, Inicijativa za revidiranje Pravilnika o ishrani učenika u osnovnim i srednjim školama Kantona Sarajevo. Inicijativa predlaže ili revidiranje Pravilnika o ishrani od strane nadležnog Ministarstva za odgoj i obrazovanje KS ili subvencioniranje troškova školskih kantina s ciljem postizanja pristupačnijih cijena ishrane za učenike škola.

Vijeće roditelja, većinom glasova članova Vijeća uz jedan suzdržan glas g. Ahmeda Hadžića (III5), podržalo je ovu inicijativu i prosljediće je VROŠKS putem svog predstavnika predsjednice Vijeća roditelja gđe. Aide Aganović.

Ad/11

(Produžetak sporazuma o saradnji sa Udruženjem „Alumni Treće gimnazije Sarajevo“)

Gospodin Izet Turković (I5) podržao je produžetak Sporazuma Vijeća roditelja sa udruženjem „Alumni Treće gimnazije Sarajevo“ kojim roditelji, na dobrovoljnoj osnovi, daju finansijsku podršku vannastavnim aktivnostima učenika i škole sa ciljem unapređenja odgojno-obrazovnog ambijenta u školi.

Naglasio je da novi Zakon o odgoju i obrazovanju u osnovnoj i srednjoj školi u Kantonu Sarajevo, sada članom 128, nije promjenio uslove sticanja prihoda za škole u odnosu na prethodni, sada već ukinuti, Zakon o srednjem obrazovanju. U tom smislu, konstatovao je, uslovi saradnje Vijeća roditelja sa udruženjem „Alumni Treće gimnazije Sarajevo“ su ostali isti.

Gospodin Mirza Hulusić (II5) je predložio da finansijske uplate roditelja idu direktno na račun škole smatrajući suvišnom i nepotrebnom saradnju škole sa udruženjem „Alumni Treće gimnazije Sarajevo“.

Direktorica škole gđa. Amra Čolić je pojasnila da su instrukcijom nadležnog Ministarstva za odgoj i obrazovanje KS direktne uplate roditelja na račun škole ukinute i da to trenutno nije praksa škola u Kantonu Sarajevo.

Ukoliko dođe, u procesu usklađivanja podzakonskih akata sa novodonesenim Zakonom o odgoju i obrazovanju u osnovnoj i srednjoj školi u Kantonu Sarajevo, do neke promjene, u smislu prethodno navedene instrukcije date školama, škola će je svakao usvojiti.

Gđa. Snježana Brkić (IV3) je podržala nastavak saradnje sa udruženjem „Alumni Treće gimnazije Sarajevo“ objašnjavajući da mi ovom saradnjom pomažemo školi za dobrobit naše djece.

Vijeće roditelja, većinom glasova članova Vijeća, uz jedan glas protiv, g. Mirza Hulusić (II5) i jedan suzdržan glas g. Ahmed Hadžić (III5), podržalo je produžetak Sporazuma saradnje Vijeća roditelja sa udruženjem „Alumni Treće gimnazije Sarajevo“.

Ad/12

(Tekuća pitanja / Inicijativa - nastavak „Škole roditeljstva“ u Trećoj gimnaziji)

Pedagog škole gđa. Hasija Dedović je obavjestila Vijeće roditelja da će projekat „Škole roditeljstva“ biti nastavljen te da Vijeće roditelja nema potrebe da se izjašnjava u smislu inicijative za nastavak ovog projekta. U novom formatu zvaće se „Blagodati roditeljstva“.

G. Izet Turković (I5) prenio je inicijativu odjeljenja koje predstavlja da se u slučajevima anonimnih dojava o postavljanju eksplozivnih sredstava (bombi) u školama organizuje online nastava za učenike škole za taj dan.

Time se učenici ne bi dovodili u situaciju da zbog anonimnih dojava propuštaju nastavu, te da propuštene dane moraju eventualno nadoknađivati na kraju polugodišta ili na kraju školske godine, što može biti u datoj situaciji nepredviđen broj dana.

Direktorica škole gđa. Amra Čolić je informisala Vijeće da su MUP Kantona Sarajevo i Ministarstvo za odgoj i obrazovanje Kantona Sarajevo prosljedili školama precizne instrukcije ponašanja škola u navedenim situacijama anonimnih dojava o postavljanju bombe u školi.

Obzirom da su navedene dojave u različitim vremenskim terminima te da reagovanje nadležnog MUP Kantona Sarajevo u takvim situacijama zahtjeva izuzetne resurse (obzirom da se obično radi o više škola koje imaju dojavu o postavljenju bombe) školama je vrlo teško napraviti vremenske pretpostavke online nastave za taj dan (kada su učenici npr. već došli u školu).

To bi bio izuzetan napor i za nastavni kadar škole, pojašnjava, jer bi nastavnici za svaki dan morali pripremati sadržaje i za online nastavu. Uz sve navedene faktore, to je vrlo teško provodiva ideja zaključila je.

U kontekstu navedenog Vijeće roditelja se nije izjašnjavalo o pomenutoj inicijativi organizovanja online nastave za navedene situacije anonimnih dojava u školama.

Gđa. Indira Čečo-Hidić (II1) i gđa. Amra Pešto (III3) obratile su ispred svojih odjeljenja predstavnicima škole u kontekstu postupanja nastavnog kadra u situacijama kada preko 50% učenika nekog odjeljenja iz kontrolnog rada dobije negativnu ocjenu, u smislu da li je tada zakonsko postupanje nastavnog kadra unositi takve ocjene u dnevnik učenika.

Pedagog škole gđa. Hasija Dedović je objasnila da se u takvim situacijama, u pravilu, ponavlja test učenicima odjeljenja. Škola prati situaciju u datom odjeljenju, konstatovala je, i utvrđuje određene okolnosti, obzirom da postoje indicije da su se učenici tog odjeljenja dogovorili da negativnim ocjenama opstruiraju pomenuti test. Jedan broj učenika tog odjeljenja nije radio dati test, kazala je, pa će se tek kompletirati sve ocjene učenika. U svakom slučaju, škola je informisana i prati situaciju, naglasila je.

Gđa. Darija Ramljak (I6) je zahvalila školi na ukazanoj psiholoskoj pomoći u prihvaćanju koncepta programa „Od rata do mira“. Istovremeno je zamolila školu da se u okviru izvještaja o realizaciji programa navede da je barem jedan roditelj iskazao rezervu u pogledu programa sa stajališta psiholoskog i sociološkog uticaja, te možebitne diskriminacije. Isto tako je ukazala na značajan nivo netransparentnosti u pogledu sadržaja historijskih časova budući da nije bilo moguće dobiti uvid u iste.

Komentari članova Vijeća roditelja, prije svega, gđe. Almire Muhović (IV5) i g. Ahmeda Hadžića (III5) vezano za manifestaciju „Od rata do mira”, u kontekstu historijskih činjenica rata u Bosni i Hercegovini (1992-1995. godine) prezentiranih učenicima na ovom putovanju, su bili da iznošenje istine ne smije biti problem u bilo kom smislu. Ne smatraju ono što je prezentirano našoj djeci na ovoj manifestaciji traumatičnim za djecu već pozivaju na informisanost naše djece o događajima proteklog rata.

Gđa. Almire Muhović (IV5) je dodatno podsjetila da su se i u obrazovnom sistemu bivše Jugoslavije učenici vodili u posjetu spomen obilježjima iz Drugog svjetskog rata uključujući i bivši logor Jasenovac te da je ono šta se prikazivalo djeci tada bilo traumatičnije od ovog što se prezentiralo našoj djeci na ovoj manifestaciji.

Roditelji su također od strane Ministarstva za odgoj i obrazovanje Kantona Sarajevo imali priliku putem dostavljenog linka popuniti anketu i ocijeniti manifestaciju „Od rata do mira”.

Druga redovna sjednica Vijeća roditelja završena je u 20.05 sati.

Zapisnik sastavio:

g. Izet Turković, sekretar Vijeća roditelja

Zapisnik ovjerila:

gđa. Aida Aganović, predsjednica Vijeća roditelja
